



## **Polyanthea Sacra**

Ex Universæ Sacræ Scripturæ Utriusque Testamenti Figuris, Symbolis, Testimoniis, Nec Non E Selectis Patrum, Aliorumque Authorum, Sententiis, eruditis Interpretationibus, Similitudinibus, rarisque Historiis collecta, Et Copiosis, Exquisitisque Materiis Moralibus De Virtutibus Et Vitiis Pro ...

**Spanner, Andreas**

**Augustae Vindelicorum, 1702**

Titulus XVII. Miracula.

---

[urn:nbn:de:hbz:466:1-79369](https://nbn-resolving.org/urn:nbn:de:hbz:466:1-79369)

## TITULUS XVII. MIRACULA.

## §. I.

*Quotidiè sunt.*

**E**A, quæ incomprehensibili indagatione mira sunt, humanis oculis usu viluerunt. Unde fit, ut, si mortuus homo suscitetur, in admirationem omnes exiliant: & quotidie homo, qui non erat, nascitur; & nemo miratur: cum procul dubiò omnibus constet, quia plus sit creati, quod non erat; quam reparari, quod erat. Quia arida virga Aaron Num. 17. 8. floruit, cuncti mirati sunt: & quotidie ex arenti terra arbor producit, virtusque pulveris in lignum vertitur; & nemo miratur. Quia quinque panibus quinque millia hominum saturati sunt; crevisse escas sub dentibus cuncti mirati sunt: quotidie sparsa grana seminum plenitudine multiplicantur spicarum; & nemo miratur. Aquam semel in vinum mutatam videntes cuncti mirati sunt: quotidie humor terræ in radicem vitis contractus per botrum in vinum vertitur, & nemo miratur &c. S. Gregor. mor. 1. 6. c. 7.

Quid non mirum facit Dominus Deus in omnibus creaturæ motibus, nisi consuetudine quotidianâ viluissent. Denique quam multa usitata calcantur, quæ considerata stupentur: sicut ipsa vis seminum, quos numeros habet, & quam vivaces, quam latenter potentes, quam in parvo magna molientes: quis adeat animò, quis promat eloqui? S. August. ep. 3.

Cuncta, quæ sunt, & facta sunt, mira valde sunt; sed consuetudine viluerunt. S. Isidorus s. 1. sentent. c. 8.

Planè solis ortus, & occasus, terræ fecunditas, temporum vicissitudo, miracula sunt, & magna miracula; sed toties hæc videmus, ut jam non fit, qui attendat. S. Bernardus s. 4. in Vigil. Nat. D.

In hoc mirabilis apparet Dei potentia; quòd in terra frigida; & sicca, aliquid virens efficitur, & de ea educitur naturaliter res virens; quæ humida, & calida. Virentia enim vivunt; & vita fundatur in humore, & calore, secundum Aristotelem in lib. de plantis. S. Thomas Aq. in c. 1. Gen.

Si vel folium arboris contemplari volueris, deprehendes in eo stupendum quoddam artificium. Bloisius par. an. c. 29.

## §. II.

*Miracula Christi.*

**E**T ecce Angeli accesserunt. Matth. 4. 11. Miracula Christi D. à magorum prodigiis distant utilitate, & beneficentiâ. Malignus

spiritus boni inscius, vanissima semper efficit ludibria; nihil hominibus commodum, & salutare, molitur; sed ea, quæ, velut in theatris vulgus stupeat. Verum bonus Christi Spiritus totus hominibus utilis, curat infirmos &c. Arnobius l. 1. contra gentes de Christo D. pro multis, ac tam liberalibus donis, quæ ab eo profecta in nos sunt, Deus dici, appellarique, deberet. Bæza l. 3. c. 3. §. 4.

Moyse miracula Ægypti exitum; Christi miracula Mundo salutem attulerunt. Moyse Ægypti primogenita occidit; Christus mortuos in vitam revocavit: Moyse Ægyptum tenebris complevit; Christus mundum splendore illustravit: Moyse fluvii aquam in sanguinem vertit, & hoc primum ejus in Ægypto miraculum; Christus aquam in vinum. Verbo: Christus mera miracula fecit, non quæ solum stupenda essent, sed salutaria hominibus. Barradius Dom. 2. Epiph. c. 3. *Lazare veni foras.* Joan. 11. Inter omnia miracula, quæ fecit Dominus, Lazari resuscitatio præcipue prædicatur. S. August. tr. 49. in Joan.

*Miscellanea.*

*Et erat Jonas in ventre piscis tribus diebus, & tribus noctibus.* Jonæ 2. 1. Multa hic miracula, 1. quòd venter piscis calidissimus Jonam non consumpsit, & in chilum converterit. 2. quòd Jonas ibidem vivere, & respirare, aeremque frigidum attrahere, potuerit. 3. quòd fœtor in ventre ceti intolerabilis Jonam non exanimaverit. 4. quòd in hoc angustissimo carcere mentis compos fuerit, & pium carmen Deo cecinerit. Cornelius hic.

*Quicumque dixerit huic monti.* Marci 11. 23. Neque Christus, aut hi, qui ab ipso potestatem faciendi miracula susceperunt, aliquando experti sunt; utrum possent montem in mare jactare, ut vocarent ad fidem incredulos. Nihil per ostentationem in miraculis Apostoli effecerunt; sed ad utilitatem videntium: quoniam hæc potestas, quæ à Spiritu S. conceditur, præterquam ad utilitatem, nemini exhibetur. Simon Cas. 1. 5. c. 6.

Sciendum nobis est, quòd, quidquid ratione hominis comprehendi potest, mirum esse jam non potest: sed sola est in miraculis ratio, potentia facientis. S. Greg. hom. 20. in Ezech.

Si velis signa videre, extermina abs te omne delictum; & vidisti, quod cupiebas. Magnus enim daemon peccatum est: quòd si abs te abjeceris; major tu mihi eris crede, quam qui demonia ejiciunt, &c. S. Chrysost. hom. 33. in Matth. c. 10.